

Sastanak Inzko – Kohout: Efikasna država ključ za članstvo u EU



Nezavisno pravosuđe i efikasna državna uprava, uz puno poštivanje ustavnih nadležnosti državnog i drugih nivoa vlasti u Bosni i Hercegovini, ključne su pretpostavke za brži napredak zemlje ka punopravnom članstvu u Evropskoj uniji, naglašeno je tokom današnjeg sastanka visokog predstavnika i specijalnog predstavnika EU Valentina Inzka sa predsjedavajućim Vijeća ministara Evropske unije, češkim ministrom inostranih poslova Janom Kohoutom, u Pragu. Inzko je zahvalio ministru Kohoutu za podršku koju je češko predsjedništvo EU pružilo Uredu visokog predstavnika i specijalnog predstavnika EU.

Inzko je izvijestio češko predsjedništvo EU o trenutnoj političkoj situaciji u Bosni i Hercegovini, s posebnim osvrtom na provedbu Sporazuma o stabilizaciji i pridruživanju i napretku zemlje u ispunjavanju uvjeta za liberalizaciju viznog režima sa Evropskom unijom. "Pozitivno je što je Vijeće ministara usaglasilo set zakona bitnih za liberalizaciju viznog režima i očekujem od Parlamenta BiH da te zakone usvoji u što bržem roku", rekao je Inzko.

Visoki predstavnik i specijalni predstavnik EU naglasio je da trenutna situacija u zemlji zahtjeva pojačani angažman Evropske unije i šire međunarodne zajednice, kako bi potakle vlasti na svim nivoima u BiH da se jače angažiraju na ispunjavanju obaveza iz Evropskog partnerstva i Sporazuma o stabilizaciji i pridruživanju sa Evropskom unijom.

Također je podsjetio da do tranzicije OHR-a u EUSR može doći samo onda kada bude ispunjeno pet ciljeva i dva uslova koje je postavilo Vijeće za implementaciju mira. "U ovom trenutku, naši napori moraju biti fokusirani na rješavanje pitanja državne imovine te okončanje pitanja vojne imovine. Zemlje članice Upravnog odbora Vijeća za implementaciju mira sastat će se krajem juna i do tada očekuju konkretan napredak u vezi sa ovim pitanjima. S tim u vezi od velike je pomoći činjenica da su za vrijeme svoga predsjedavanja EU i bivši i sadašnji češki ministar vanjskih poslova stavili Bosnu i Hercegovinu među prioritete EU", zaključio je visoki predstavnik i specijalni predstavnik EU.

Danas visoki predstavnik i specijalni predstavnik EU Inzko putuje u Štokholm, gdje će se sastati sa švedskim ministrom vanjskih poslova Carlom Bildtom. Švedska će krajem ovog mjeseca preuzeti predsjedavanje Evropskom unijom. HR/EUSR Inzko će u Štokholmu učestvovati u konferenciji o budućem angažmanu EU u Bosni i Hercegovini, koju organizira švedsko ministarstvo vanjskih poslova.